



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7 Yangia anidakangma : Tir Yimyim tiryimyim@aolima tir yimyim TAPAK 10

Aluyimba ozüng magien tashi onoki longkak aittsü: Rakesh Tikait

Phogat-i gold angu; temaba jenjangi tanaben tuogo



VOL. XVIII NO. 143 (ADOK 143) DIMAPUR

TENTONÜ (MONDAY)

METSÜREMI (MARCH) 08, 2021

₹ 5.00

Centre-i Assam Rifles dang Myanmar nunger noktangsü tuyur

Guwahati, March 7 (Agencies): Centre sorkari Assam Rifles dang Myanmar nunger arrtsü adener India telungi aitba noktangsü tetuyuba agütsüogo.

Assam Rifles-i Northeast nung India-Myanmar arrtsü anüker aser Union home ministry-i parnok dang arrtsü adena aittsü merangertem meyipa yoktsü atema metetdaksüogo.

Myanmar nunger visa mesüra travel permit tejanga melii India telungi maitdaksütsüla ta MHA-i tetuyuba agütsü.

Myanmar nunger police 8-i arrtsü adener Mizoram nung arua jenokba meyipa yokang ta Myanmar ketdangsürtemi India sorkar dang shidi züluba sülen MHA-i iba tetuyuba agütsüogo.

Chin state nung parnoki timi lungkak aiterem dak injang khaloktsütsü memolungba sülen Army-i parnok arrshi ta Mizoram nung arua jenokba Myanmar

police-i ketdangsürtem dang ashi.

Tesüiba anogo ishika tsüngda Myanmar nungi police aika dena refugee 100 den timba Mizoram nung arua jenoka lir. Parnok ya timba Chin state nungi lir.

Mizoram Home Department-ia police kar dena Myanmar nunger nisung 16 state nung arua jenoka lir ta osang jangjatsüogo.

1988 küm Myanmar nung sorkar anema apusodang aser nisung meyirjang aika tepsetdang India-i Myanmar nunger asoshi arrtsü lapokja liasü.

Iba mapang Myanmar nunger MP tem dena meyirjang aika Manipur aser Mizoram nung arua jenok aser ano parnok aika Delhi tashi oa UNHCR refugee cards angu.

Iba mapang Rajiv Gandhi'er sorkari Burmese provisional government in exile pusemstsü aser senotsü teyari agütsütsü telemtetba agi.

Assam BJP-i chief ministerial candidate meshimer

Guwahati, March 7 (Agencies): May 2, 2021 nü Assam assembly election indang results adokba sülen ang BJP-i chief ministerial candidate atema telemtetba agütsü ta metetdaksüogo.

Taoba hopta BJP-i Assam nung assembly menden 70 atema candidates shimba osang sangoktsüogo.

Assam Chief Minister Sarbananda Sonowal-i Majuli menden nungi aser Health Minister Himanta Biswa Sarma-i Jalukbari nungi tokteptsü.

Sarma ya north-east nung BJP atema asalentong yanglur tongtiba ta züngshir aser pai assembly election nung tokteptsü balaka jangraa mali ta shia liasü.

Ajisüaka, BJP-i Sonowal chief ministerial candidate asütsü ta mesayui Sonowal aser Sarma na külem lenisüba kübok election nung tokteptsü telemtetba agi, ta osang kar ajanga ashi.

Deobarnü Assam BJP president Ranjit Dass-i osangbener dang ashiba agi election result adokba sülen ang chief ministerial candidate atema telemtetba agütsü.

"Election matongdang mesüra polling agiba mapang onoki chief ministerial candidate shinga meshimtsü saka

parliamentary board-i dang telemtetba agütsü" ta Dass-i ashi.

2016 assembly election nung BJP-i Assam nung chief ministerial candidate asütsü atema Sonowal shimteta liasü.

Ajisüaka, takümba BJP-i chief minister menden lapoka yutsür aser iba nung Sonowal mesüra Sarma shimtsü akok.

"Assam nung BJP sorkar aliba agi chief ministerial candidate mali. Onoki sorkar tashi maliba state tem nung dang chief ministerial candidate shimer" ta Assam BJP president-isa metetdaksü.

2016 küm atalokba ama BJP-i Upper Assam nung takok tulu angutsü imlar. Iba tesem nung March 27 nü polling asütsü. Iba tesem nung assembly menden 47 lir aser 2016 assembly election nung Congress-i menden 7 nung dang takok angu.

Züngsem 126 agi akümba Assam legislative assembly nung March 27 nü menden 47 atema election asütsü. Iba sülen April 1 nü menden 39 aser April 6 nü menden 40 atema election agütsü.

Taküm Assam assembly election nung BJP-i AGP aser United People's Party Liberal (UPPL) den lokteper tokteptsü. AGP-i menden 26 aser UPPL-i menden 8 nung tokteptsü.



March 3, 2021 nü India yimtiba New Delhi nung Myanmar nungi Chin refugee temi lungkak aitdang agiba noksa ka angur. (file)

Northeast nungeri 'civil disobedience movement' pusemer

Guwahati, March 7 (Agencies): Myanmar nung ketdangsürtemi lungkak aiterem dak tashiyim mapa inyakba osangtem angashia, Manipur aser Nagaland nung alirtemia Mizoram den külemi civil disobedience movement (CDM) pusema nungitba metetdaksüogo.

Myanmar nung police 8 dena nisung 50 shi ka Mizoram nung arua jenoka lir. Tatmadaw (Myanmar military)-i parnok merenshitsu tsüba bilemba agi parnok jena aru, ta Mizoram ketdangsürtemi ashi.

Northeast State pezü-Arunachal Pradesh, Nagaland, Manipur aser Mizoram-i Myanmar den kilometre 1,643 agi arrtsütepa aliba dang masü saka kintem den tesentaktep balala lir.

Myanmar nung mepetmesü adokdang Northeast state pezü rongnung Mizoram-i khuret tuluba ajangshir.

Mizoram nung Mizo nungeri Myanmar nung Chin State nung aliba Chin nunger den sendaktepa lir. Chin nunger ya Manipur nunga Kuki-Zomi den tesentaktep lir. Myanmar nung aliba Naga nungertemi Manipur, Nagaland aser Arunachal Pradesh

nung aliba Naga nunger kin balala den sendaktepa lir.

"Martial law ya nübertemi sorkar ketdangsüba nung shilem agiba azüokba lir. Myanmar nung tensa süngjemdaksütsü atema international community-i tebang aitsüla aser sorkari teyari agüja kiralongraba maparen nungi nisung takütem kümzüksüla" ta All Manipur Tribal Union (AMTU) working president Romeo Bungdon-i United Nations Security Council dang mepishio.

Myanmar nung amenoka aliba The Irrawaddy osangkaket ajanga ashiba agi, mitkar ketdangsüba anema police ketdangsür 600 den timbaji Civil Disobedience Movement (CDM) nung denogo.

Rohingya tebilemstsü onük adokdak Rakhine State nung dang police-i ola madoker, ta The Irrawaddy nungsa metetdaksüogo.

Taküm February ita Myanmar nung mitkartemi sorkar atsüngdokba sülen police aikati mapa nungi anenogo. Parnok timba ka Criminal Investigation Department, Special Branch, Tourist Security Police aser training centre tem nungi lir, ta osangkaket nungsa ashi.

Mapa nungi anenba police ketdangsürtem rongnung Special Branch Major Tin Min Tun dena lir. Taoba hopta tu pai Facebook nung "ni mitkar ketdangsüba kübok inyaktsü memolunger. Ni CDM nung shilem agir civil servants den denogo" ta metetdaksüogo.

ning aliba Naga nunger kin balala den sendaktepa lir.

Myanmar nung mepetmesü adokdang Northeast state pezü rongnung Mizoram-i khuret tuluba ajangshir.

Myanmar nung amenoka aliba The Irrawaddy osangkaket ajanga ashiba agi, mitkar ketdangsüba anema police ketdangsür 600 den timbaji Civil Disobedience Movement (CDM) nung denogo.

Rohingya tebilemstsü onük adokdak Rakhine State nung dang police-i ola madoker, ta The Irrawaddy nungsa metetdaksüogo.

Myanmar nung amenoka aliba The Irrawaddy osangkaket ajanga ashiba agi, mitkar ketdangsüba anema police ketdangsür 600 den timbaji Civil Disobedience Movement (CDM) nung denogo.

Rohingya tebilemstsü onük adokdak Rakhine State nung dang police-i ola madoker, ta The Irrawaddy nungsa metetdaksüogo.

Rohingya tebilemstsü onük adokdak Rakhine State nung dang police-i ola madoker, ta The Irrawaddy nungsa metetdaksüogo.

Rohingya tebilemstsü onük adokdak Rakhine State nung dang police-i ola madoker, ta The Irrawaddy nungsa metetdaksüogo.

Rohingya tebilemstsü onük adokdak Rakhine State nung dang police-i ola madoker, ta The Irrawaddy nungsa metetdaksüogo.

Rohingya tebilemstsü onük adokdak Rakhine State nung dang police-i ola madoker, ta The Irrawaddy nungsa metetdaksüogo.

COVID-19 Nagaland: Nisung 6 dak putet

Kohima, March 7 (TYO): Deobarnü Nagaland nung nisung 6 dak COVID-19 aliba putetogo aser parnok züngsema nisung 12,217 kümogo.

"Kohima nung nisung 6 dak COVID-19 aliba putet. Kohima nungsa nisung ka taneptsü nguogo" ta Health & Family Welfare Minister S Pangnyu Phom-i metetdaksü.

"Nisung 12,217 rongnung 11,953 taneptsü nguogo aser

tang parnok 20 anepaludar. Nagaland nung COVID-19 nungi taneptsü angubaji 97.83% lir" ta paisa ashi.

"Nagaland nung COVID-19 puteter nisung 91 asüba nungi parnok 10 bo tanga timtem ajanga asü. Külen, nisung 153 tashi tanga state temi ogo," ta Health & Family Welfare Director, Dr Denis Hangsing-i metetdaksü.

"Tang anepalur nisung 20 ji

Dimapur nung ka aser Kohima nung 19 lir aser parnok ajak dang shirangba yimyabo mali" ta paisa ashi.

"Nagaland nung COVID-19 alitsü akok ta temolung melemi bilemba sample 1,31,788 tendangogo. RT-PCR ajanga sample 75,086, TrueNat ajanga sample 37,376 aser Rapid Antigen Test ajanga sample 19,326 tendang" ta Dr Hangsing-isa metetdaksü.

CRPF temi Mima nung Civic Action Programme agi



Dimapur, Metsüremi/March 07 (TYO): Central Reserve Police Force (CRPF) aser nürburtem tsüingta apu alatsü mechi 78 Bn., CRPF ajanga Mima, Kohima nung March 7, 2021 nü Civic Action Programme ka ayongzüka liasü.

Randeep Datta, PMG, IGP M&N Sector lenisüba kübok Syamchand De, DIGP (Ops) CRPF, Kohima ajanga Mima yimtsüing nung alir nem lema

agütsüsü atema saisapong oset aser library asoshi tongtipang kakettem semzükja liasü.

Mima yimtsüing nung Civic Action Programme ayongzüktetba atema Syamchand De, DIGP (Ops), CRPF, Kohima ajanga pelaba lemsatep aser CRPF temi pei mapa dak alia nürburtem nüngdakba mapang yaritsü teti renema lir, ta ashi.

78 Bn., Central Reserve

Police Force ya Nagaland nung amenokba sülen mapang shia iba amala sentong ya ayongzüka agia arur aser nürburtem timtem angateta teyari balala agüja arur.

CRPF tem den tesendaktep junga ayuba aser amalitep aliba atema iba sentong nung Bijender Kumar 2 I/C, Commandant 78 Bn., (AOD) ajanga pelaba lemsatepa liasü.

Mokokchung nung Community Service Provider nem training agütsü



DAY-NSRLM Mokokchung ajanga Chuchuyimlang Block nung March 5-6, 2021 anogotem nung Community Service Providers on Potato Farming asoshi training agütsüba mapang tetushi tesemdanger, shisalen sayur aser training nung adenertem külemi tangokba noksa ka yangi angur.

Dimapur, Metsüremi/March 07 (TYO): District Management Unit (DMMU) DAY-NSRLM ajanga National Rural Livelihood Mission kübok Community Service Providers on Potato farming and Piggery breeding unit inauguration program atema ananü Block Level Training ka Mokokchung district kübok Chuchuyimlang Block nung March 5-6, 2021 anogotem agüja liasü, kong nisung 60 dak temai shilem agi.

Chuchuyimlang Block kübok Longkong aser Yaongyimti nung mozü mamshi Potato Farming tajungba kumdaktsüsü asoshi agütsüba training nung shisalen sayurtem ya NSRLM nungi

Takalemba Jamir (DFS, NSRLM), ImsuakumPongen (Area co-ordinator Livelihoods) aser Temsurenla Kichu (Area Co-ordinator Livelihoods) nungertem liasü.

Mongsenyimti nung Piggery Breeding indang training nung tetushi tesemdanger ya Taliyanger (Project Officer DRDA Mokokchung) liasü. Iba sentong nung Temsujungla (Village Facilitator) menden liasü aser Rev. Imti Pastor, Mongsenyimti Compound Baptist Arogo ajanga sarasadema sentong tenzük aser Piggery Breeding Unit indang onük nung ajemdaker

Takalemba DFS, NSRLM Mokokchung ajanga jembii. Sentong nung tetushi tesemdanger, Taliyanger (Project Officer DRDA Mokokchung) aser mongsenyimti Village Council chairman nai o tatsüsü jembii aser Odinaro VLO president ajanga tepela ankep o jembia liasü.

Iba sentong ya DAY-NSRLM indang Annual Action Plan for the FY-2020-2021 nung shilem ka ama DAY-NSRLM Mokokchung ajanga ayongzüka liasü.

Potato Farming aser Ak metsüba tajungba kumdakja aluyimer tetsürtem rongsen tali renlokdaaktsüsü nükjidong nung iba sentong ya ayongzüka liasü.

NVCO ajanga International Women's Day mungogo

Dimapur, Metsüremi/March 07 (TYO): Nagaland Voluntary Consumers' Organisation (NVCO) pur tang World Consumer Rights' Day temungdak aliba nung shilem ka ama parnoki March 7, 2021 nü "Women in Leadership: Achieving an Equal Future in a COVID-19 World" omen nung ajemdaker Kohima nung International Women's Day munga liasü.

Alima nung tetsürtemi shilem agiba ya züngshitsüla aser akhumtsüba agizüktsüla. Tetsürtem ya COVID-19 den

raraba nung front-line aser health sector worker, scientist, doctor aser caregiver ama yakbang nung nokdaka lir. Kodang tetsür ka lenir asür, iba mapang asenoki result tem tajung angur aser COVID-19 tashidak wara den raraba nunga tetsürtemi anir tatishitsü tajung aketba mapatem inyaker, ta NVCO sangdong ka ajanga ashi.

2021 küm World Consumer Rights Day omen "Tackling Plastic Pollution" nung takok angutsü atema tetsürtemi kanga yakyaka aser bendanga agüja

inyaktsü tongtipang lir. Ita ishika lir tzunglu tera aruba sülena asenoki smart city ta ajaka Kohima aser Dimapur yimti lenmang aser kinük-kisang ajungalen khen dang amshiba plastic bottle aser jana balala temai adoka angur. Nürburtemi "Keep our city clean" aser "Plastic-free town" yimiyimayima kanga meranga lokti nübudok inyaker aser campaign tem ayongzüker, saka ibai teperi masü aser asen jana aser khen amshiba plastic tem amshi anentsü asen khuret lir, ta parnoki ashi.

K. Therie-i International Women's Daysalem lemsatep

Dimapur, Metsüremi/March 07 (TYO): Taküm International Women's Day omen ya tarutsü nung tetsür lenir kasa adoktsü asoshi sangdonga lir, koba agi ken o balala nung külemi telemteba agitetsü. International Women's Day ya among tenzük küm 110 jungogo. Anungji asenoki tarutsü jenjang tajungba kumdaktsüsü atema tangatetba kati arutsü mapang tongja tongogo, ta NPCC tir, K. Therie-i sangdong ka nung ashi.

Garment Workers nem akhum agütsüsü asoshi Socialist Party of America ajanga 1909 küm February 28 nü iba anogo ya shimtet aser March 8, 1911 nung iba anogomung mezüing munga liasü.

Asenok tetsü temeim nung janratema liyonga aruaka tetsür jenjang aser yimya tajungtem angatetba nung küm 100 dak tema agi asenok atsüingzüka lir. NSCW mendenpula, Khrienuo Tachu-i züluba asenok aikati züingdang alitsü, aser lai ashiba ajunga nia agizükter, ta Therie-i ashi.

Taküm iba anogomung nükjidong tongtetsü asoshi democratic yimya nung yimsüsüba indang tangatetba nung Nagaland nung aliba tetsürtem nem shisatsü agütsüsü nüngdak, ta ajiteter. Kilung nung tepuokdak

ayur ama amshitsü tangatetba nungi parok anitetsüla. Parnok nem shidak nung telemteba agidakjang aser tai nungi pilaa lidakjang. Democracy ya kijai indang ozüing mesüra sobaliba ka masü, ta NPCC tiri ashi.

Ibai nürbur, kin sanger aser ajak ajungtem atema lir. Item nükjidong tongtetsü atema tetsürtemi Electoral Roll nung tenüing züluka aliba vote agütsüteter tetsür shilem 50 ajungmesotsüla. Parnok ajungmesotsü lenmang temelatibaji loktiliba nung kongshiba aser mapetba arok ken o nung ka akumtsüla, ta pai ashi.

Nagaland nung tetsürtemi lokti senden nung shilem magiba aser jembishinü nung madenba asenoki ngua arur.

Tetsürtemi arok tejangraba nung tetsükdaktsü ajurubatem mejangiatet tashi aser political party tem nung arua shilem magi tashi aser election nung jangrabangra shilem magi tashi metetüంగా ka mesüka parnok maneni tesülen atsüingzüka yutsüsü. Linük aser alima nung tetsür lenirtemi takok jenti nguteter. Aser tetsür lenisüba kübok yimsüsüba tsütsüa lirumedema aor, ta Therie-i ashi.

Tanü International Women's Day benjongba mapang Nagaland nung aliba tetsür ajungai Nagaland ajungtsü asoshi nokdaktüsü ayongzüker, ta pai ashi.

Assam Rifles puri sentong balala ayongzüka agi



Dimapur, Metsüremi/March 07 (TYO): HQ IGAR (North) kübok Assam Rifles, Jalukie Battalion ajanga Peren district kübok Benreu yimtsüing nung March 05, 2021 nü Medical Camp ka ayongzüka liasü.

Meta talang nung alirtem mozüki bushia moteter nem medical teyari balala agütsüsü nükjidong nung iba medical camp ya ayongzüka liasü. Sepaitemi nürburtem asoshi anibelem mesasai iba ama mapa tajung inyakba asoshi yimtsüing nung ketdangsürtemi pelaba lemsatepa liasü.

Iba medical camp nung tetsür 83, tebur 46 aser tanur

57 tashi temang anepalua liasü. Maneni HQ IGAR (North) kübok Assam Rifles, Phek Battalion ajanga Phek district kübok Meluri jila nung March 7, 2021 nü Veterans meet ayongzüka liasü.

Iba sentong nung Meluri, Kamaleah aser Phoisa tesemtem nungi sepai tejentem arua dena liasü. Sepai tejentem den tesendaktep tali akangshitsü aser parnok timtem ajurubatem anepalutsü nükjidong nung iba sentong ya ayongzüka liasü. Iba sentong ayongzüka atema sepai tejentemi Assam Rifles dang pelaba lemsatep aser parnok den amalitep alitsü shia liasü.



Arunachal Pradesh CM Pema Khandu-i taoba Chief minister asür Dorjee Khandu tenung nung stadium ka lapoktsüdang agiba noksa angur. Honibarnü CM Pema Khandu-i Itanagar anasa Don Bosco College, Jullang nung pa tebu aser taoba chief minister Dorjee Khandu nungtem nung stadium ji lapoktsü.

Assam election: Congress aser AIUDF denbo BJP helicopter timba

Guwahati, March 7, 2021 (Agencies): Assam nung Assembly Election agitsü hopta asem dang lia, shilem asem lemsar election agidang party lennirtem nüboyimba sentong nung amshitsü atema BJP-i taa dalang agütsür helicopter pungo amshitsü renemogo. Assam nung BJP-i menden 100 dak tema takok angutsü nükjidadong lir aser iba Election campaign atema taa dalang agütsür helicopter bener aruba maparen nung parnoki Congress aser tanga telok ajatetogo. BJP indang teloktep telok

AGP-i party president Atul Bora aser executive president Keshab Mahanta na atema helicopter ana bener arua lir. Party sangdong ajanga ashiba agi, Congress-i taa agütsür helicopter ana tashi bener aruogo aser tarutsü anogotem nung nungdakra Election maparen atema helicopter talila bener arua amshitsü akok. Iba campaign nung State Congress president Ripun Bora aser AICC lennirtemi helicopter ka amshitsü; kasa mapang tanga lennirtem helicopter tanabubaji amshitsü.

Badrudin Ajmal-i aniba AIUDF aser party tasen Asom Jatiya Parishad (AJP) teloktemia helicopter ka ka bener arua lir. Item helicopter timbaka Delhi nung amenoka aliba nija company tem nungi taa agütsür bener aru. Sorkar meyong Pawan Hans danga teloktemi helicopter mekaa yuogo. Helicopter ghonda ka amshiba taa ji Rs 70,000 nungi tenzüker Rs 1.70 lakh tashi agir. Iba tetezü nüboyimtsü atema party temi sen crore aika indoktsü terenemba lir.

Scholarship maparen ochimashi inyakba nung ano nisung ka apu

Guwahati, March 07, 2021 (Agencies): Sen crore aika ochimashi amshiba maparen dak sendakba nung Assam Police nung CID-i ano nisung ka puogo. Assam nung minority students atema pre-matric scholarship scheme tenzüksüdang iba ochimashi mapa ya inyak. Pua alisang ya Nozirul Islam ta jangjaogo aser Kamrup district kübok Tupamari yimtsüng nungi pa apu. Honibarnü Chief Judicial Magistrate Kamrup (Metro)

indang Court ajanga pa police ket nung ayutsü asoshi temelaba agütsüogo. Taoba mapang nunga iba maparen dak sendakba nung CID-i nisung 23 pua lir. 2018 küm nungi minority students atema pre-Matric scholarship sen jenti yokba nung parnoki ochimeshii sen amshia lir. Yaküm August 28 nü Assam Minority Development Board indang director aser state nodal officer, Pre-Matric Scholarship for Minorities, Mahmood Hassan-i FIR ka benokba sülen

CID-i bushisüngdanga arudang nisungtem apu. Iba scholarship ya kaketshirtem shirnok kibong nung küm ka piyong aaba sen lakh 1 dak tema matur aser taoba tatidang nung marks 50% angur minority kaketshirtem nem agütsür. Minority kin nungi class I nungi X kaketshir atema iba scheme kübok online nung scholarship apply asütsü temsüa lir. Direct Benefit Transfer (DBT) mode ajanga kaketshirtem dangi iba sen yoker.

Congress-i candidate 40 indang mezüng list sangdongogo

Guwahati, March 07, 2021 (Agencies): Assam Assembly elections 2021 nung Congress-i candidate indang mezüng list sangdongogo. Assam Legislative Assembly election indang Congress indang Central Election Committee (CEC)-i shimba candidate list ya CEC in-charge aser All Indian Congress Committee (AICC) general secretary Mukul Wasnik-i sign süogo. Iba list nung Assam Pradesh Congress Committee (APCC) president Ripun Bora-i Gohpur menden, taoba mapang minister Rakibul Hussain-i Samaguri menden aser taoba minister Bismita Gogoi-i Khumtai menden nung tokteptsü atema party ticket agütsüba shia lir. Mariani menden nungi MLA Rupjyoti Kurmi, Thowra nungi Sushanta Borgohain aser Bihpuria constituency nungi AICC general secretary Bhupen Kumar Borah nungeri tokteptsü. Lakhimpur menden atema Dr Joy Prakash Das-i party ticket nguogo. Taoba mapang MLA Ghana Burgohain-a candidate tetemjen ka liasü aser pai Lakhimpur menden atema meranga toktep. Taoba minister ana Pranati Phukan aser Atuwa Munda napronglai Naharkatia aser Tingkhong mententem atema party ticket lezmzüksüogo. Nazira menden atema Assam Legislative Assembly lennir aser MLA Debabrata Saikia-i tokteptsü. Party nung züngsem tasen aser kentener Ajoy Phukan-

i Chabua menden atema party ticket nguogo. Taoba mapang Assam Congress president Anjan Dutta (shiba 2016 Assam Assembly election sülen asü), par jala Angkita-i Amguri menden atema party ticket nguogo. Jorhat menden atema AICC general secretary aser taoba mapang Jorhat MLA Rana Goswami-i party ticket angu. Taoba mapang Tezpur MP aser ex-BJP lennir Ram Prasad Sarma-i Barchala menden atema Congress ticket nguogo. Congress party ticket angur tanga candidate temji Benudhar Nath - Dhekiajuli, Dr. Anuj Kumar Mech - Tezpur, Abhijit Hazarika - Rangapara, Praneshwar Basumatary - Sootea, Anjan Borah - Biswanath, Sibamoni Bora - Batadroba, Md. Nurul Huda - Rupohihat, Prasanta Kumar Saikia - Kaliabor, Roselina Tirkey - Sarupathar, Bitupan Saikia - Golaghat, Bani Hazarika - Dergaon (SC), Pallabi Gogoi - Teok, , Suruj Dehingia - Mahmara, Sushil Kumar Suri - Sonari, Subhramitra Gogoi - Sibsagar, Sailen Sonowal - Dhemaji, Dr Hema Hari Prasanna Pegu - Jonai (ST), Pranjal Ghatowar - Moran, Rajkumar Nilnetra Neog - Dibrugarh, Manoj Dhanowar - Lahowal aser Dhruba Gogoi- Duliajan alitsü. Maneni, Digboi nungi Sibanath Chetia-i tokteptsü, Margherita atema Manoranjan Borgohain, Doom Dooma seat atema Durga Bhumij-i ticket nguogo aser Sadiya seat atema Lakhin Ch Chetia ya party candidate alitsü.

AGHSSASTA-i CM'er ki jakdang lumitsü

Tura, March 7 (Agencies): All Garo Hills SSA School Teachers' Association (AGHSSASTA)-i hoptya ka lungkak aita aruba tembangba osang metetdaksüogo. Ajisüaka, parnoki Tura nung Chief Minister Conrad Sangma'er ki jakdang mapang telatet makai lumia lungkak aittsü lemtet. Ita 8 tashi parnok nem itasen magütsüba meshia AGHSSASTA-i Garo Hills ajungalen March 1 nungi lungkak ait tenzüker March 5

tashi lungkak aitogo. "Onok tesayurtemi kaketshirtem atema kanga bilemstür aser iba jagi March 8 nungibo class-i moii lungkak aitba anentsü lemtet. Ajisüaka, bangdak ketdangpurtemi onoki akhangba atema telangzüba tajung magütsüba agi onoki ozüngi melaba ama tesashiba lungkak aittsü lemtetogo" ta AGHSSASTA-i metetdaksü. Küm pezü tashi parnok nem arrears magütsüi arur ta tesayurtemisa ashi.



Deobar nikongdang Assam Jaitya Parishad (AJP)-i Barak Valley nung candidate pungu toktepdaktsütsü osang metetdaksüogo. Tanü nikongdang AJP-i Barak Valley nung candidate pungu shimba dena constituency 50 nung nisungtem shimba osang metetdaksüogo. AJP-i Assam nung lisopurtem yimten temeten kümzüka ayutsü atema tenangzüka agia lir. (Guwahati, March 7)

Piles Anepaluba - Kabiraj dang alaktela pelaba metetdaksür. Piles, Fistullah, Gastric, Sinus aser Tonsil-Ajma agi ni kangshia liasü aser Rectum nungi azü alu dang mapang talangka item timtem nungi junga taneptsü mang. Ajisüaka, tang Kabiraj H. Umar Chesam contact no. 7627917983 / 7627998690 Address: 1. Burma Camp, Police point, 2) near Nagaland Gate, tetuyuba nung anidaka surgery kecha magii (non-surgical) anepalur anogo ishika tsüngda ni taneptsü ngua liasü aser iba sülen tanü tashi kü temang nung timtem kecha mali. Time: 9 AM - 5 PM Yours sincerely - Inakali, Add: Chakesang colony



TIR YIMYIM YIMOBILEM (EDITORIAL)

DIMAPUR TENTONÜ, METSÜREMI (MARCH) 08, 2021

TETSÜRTEM LENISÜBA

Tanü ya alima ajaklen Tetsürtem anogo amonger. Iba anogomong among tenzükba nükjidongji alima nung tetsürtem lenisüba ajanga temelenshi tajung bener aruba indang tenüngsangteptsü aser ano tetsürtem taküm nung anogo shia ajuruba timtem aser takoksa indang jembitsü. Aji oda, iba anogomong ya alima ajaklen tetsürtema teburtem den yimten aser lokti nung kasasa shilem agia khuret abentsü nungdakba onük benoka jembiba anogo lir. Iba 2021 küm yabo tanga kümtem dang nungi balaka, Covid-19 tashidak wara ajanga maparen ajak nung takoksa tulu ajuruba küm tamajung ka lir. Ibayongji, taküm iba anogomong omen ya "Tetsürtem lenisüba : Covid-19 lima nung tarutsü jenjang kasasa tongtetba" ta agüja lir. Tetezü, tang ama mapang tamajung nunga tetsürtemiang lenisüba tajungba agütsür, anungji item mapatemji reprangteta tarutsü nungbo tetsür tebur kecha tebandang mali, lokti aser yimten nung kasasa shilem agitettsüsa ajungshiteptsübaji kanga tongtibang asütsü. Atangji, lenisüba indang jembidang, asenok mulungi jet ta yimten aser lokti nung telemtetba agidak shilem agitsüsa menden ngutetba indang arur. Iba jagi asenoki yimten yimsüsüba menden nung tetsürtem asoshi noklang nung shilem 33 shiteta yutsütsü indang jembir. Iba nükjidongji tetsürtema nübortem asoshi telemtetba agidak shilem agidaksütsü asoshi lenmang lapokja aiddaksüba sentong ka lir. Ajisüaka, taküm küm iba anogomong omen nung aliba ama, tarutsü nung tetsür tebur kecha mebandangi lokti aser yimten nung shilem agitsü asoshibo yimten nung shilem ka shiteta yutsüba agi masü, saka kidang kibong nung jala aser jabasotem tsüngda mapa nung aser kaketshisatsü bushiba nung tebandang melii kasasa khuret aser maongka agütsüba ajanga dang tongtettsü. Asenoki aiben lenisüba (Leadership) ta asüba ya tatar menden nung amenba mesüra lokti nung tanishir asütsü asoshi jenjang ka ngutetbajiang lenir ta bilemer, saka lenisüba ya menden masü saka nübortem nungdak aser timtemba reprangteta peisasa mulungtetter tajung kumdaksütsü asoshi inyakbajiang lenisüba lir. Tatsüba nung, lenisüba ya menden masü saka teyari agütsüba mapa lir. Tanü asen lima nung dang masü saka alima tesem aika nung tetsürtemi lokti aser yimten nung teburtem den kasasa shilem magitetter aser senmangtsümangbaren nunga tetsürtem aika teküpbok jenjang nung lir. Ibaji ajungbenaka atalokba masü saka kidang kibong nungi tenzüker. Asenok loktiliba nunga aiben teburtemi tetsürtem dang nenok 'tetsür tanur' ta ashiba angashir. Tetezü tetsürjibo tain süaka tanurtem den kasa jenjang nung amshir. Iba jagi, joko, tetsürtemia dena 'onok tetsür tanur' ta jembir aser lokti aser yimten nung shilem agitsü tebilema mebilemer. Iba amaji, asenok sobalibaren aika nung tetsürtem mezüngokba ajanga lokti aser yimten nung shilem agia yanglushitsübaji tetsürtem shilem masü amai kümogo. Asenok kidang kibong nunga tetsür tebur mapa bendanga inyakdaksür aser tetsürbo tangar kiyii aotsüji ta bilema taküm jenjang tebur den kasasa yanglutsütsübaji teindok amai bilemer. Aji oda, kidang kibong nung ki aoktsü, sü ashitsü aser soruchioktsüba mapatem ajak tetsürtem mapaa ta bilema inyakdaksü nungbo, parnokji ki aoker, sü shidoker aser soruchioker dang akümtsü ana nung lir. Atangji, item ki mapatemjia inyak ashitsüla saka itemji tetsür kisüng mapa mekümdaksütsüla. Iba amaji kodang asenoki asen kidang kibong nung tetsür tebur medendangi kasasa akümtsüba aser meima anepaludir, parnok tain kümer külena yimten aser lokti nung 'tetsür tanur' ta peisasa ilaa bilemba shisatsü malitsü. Tang ama alima tashidak wara agi meketbanger, asenok tounüleri mao aser teinyaknüsü meinyak kidang külemi amongba mapang ya, jala jabasotem nem tarutsü nung lokti aser yimten nung lenisüba khuret bentettsü asoshi shisatsü agütsüba aser parnok den medemer kümer sensaksemba mapang tajung ka sūdaksütsüla. Taküm nung lenisüba mapang ya tanur asüdang kibong nung mesüra Sunday school nung Lai ka azüngba, ken ka atenba, sarasademba aser otsü tatsüka ashiba nungi tenzüker. Iba amaji kodang asenoki kidang tanurtem nem lenisüba lenmang tajung sayua anitetdir, idangjibo yimten nung tetsürtem asoshi shilem balaka shiteta meyutsüyonga, teburtem dangbo tetsürtemiang shilem tuluba agitettsü. Taküm iba Alima Tetsürtem Anogomong tayongzükbaji aji sūdaksüdi.

OLEMSABANG

NBCC & ABAM CLEAN ELECTION INYAKA ARUBA NUNG TAKOK ASER TAMAKOK

~ Rev. Ayutemjen, Pastor, Dibuia

Alima meimchir aser libaliro, tzü-mopong melenshia aodang kodanga memelenshiba Tsüngrem O dak ajemdaker Laishiri aser lokti nung temelenshi adokdaksütsü janrartem, lokti balala aser Arogo nung Tsüngremi mulungba ama shilem tajung agitsü asoshi temulunger telok ka "YANGLUSHIDI SENSAXSEM SABANG (YSS)" (Whatsapp Group) tenteta mapang shia shisatokden sensaksem akar. Tang tashi nung takotet laishirtemi anir asen Aor arogo aser loki lenir tajung nübu 253 iba YSS telok nung dena lir. 2021 küm nungi ita nung khen-anaben ZOOM ajanga shisatokden akar. Tsüklai 23, (Feb.) Sangtennü (Tues.) shisatokden nung "NBCC & ABAM Clean Election: Inyaka aruba nung Takok aser Tamakok" indang Rev. Dr. Mar Atsongchanger, Executive Secretary ABAM aser Mr. K. Temjen Jamir, Editor, Tir Yimyim, tenati jembir. Onük jembiri jembir külen o semlok aser lokti o lemtep liasü. Iba sentong Rev. Yapang Mollier, Church & Mission Secretary ABAM aser Mrs. Imtilemla, Asst. Head Mistress, I.B.S. tenati ketang süa agi. Iba shisatokden nung lemsatepba tongtibang kar lemsateper.

O JEMBIRTEMI JEMBIBA TONGTIBANGTEM:

NBCC & ABAM Clean Election Koma inyaka aru:

Tsüngremi nisungji temerük aser temeshiba nung yanglu saka meimchiri Tsüngrem anema temenen mena nung temenenpur aküm. Iba temenen nungi meshiteta Tsüngremer sentong nung temeshiba kümdaksütsü, nisung shia Khristar nütsüng tajung ka ka kümdakja, kuliser tajung ka ka kümdaksütsübaji Tsüngremi tamanger shia nem nungloktsüba mapa tulutiba lir. Anungji Khrista nütsüng ka ama tamanger shia maparen ajak nung kuliser tajung alitsü nungdak.

Tanü Naga lima tia asadangdang lokti aser yimden yimsüsübaren teraksa aika agi sünga lir. Iba teraksa ya kong nungi ta shisadangdang item teraksa ya Election dak tera yanga lir ta ajiteter. Naga lima mezüngbuba election nungbo kanga teraksa adokba mali asü, saka tanabuba election nungi teraksaji tenzüka aru. Anungji iba teraksa akoktsü asoshi nübortem nem tangatetba tajung agütsütsü nungdak ta angateta ABAM aser NBCC-i Clean Election Yimyim ayimtsü 1972 nungi tenzüker.

Clean Election yimyim aser maparen ya Party ka noktangsü asoshi masü mesüra party ka ajangzükdaksütsü asoshi masü, saka Ochi shia election agitsü atema tesayuba agütsüba lir. Iba yimyim Naga nunger dang masü, India nunger ajak tajangzük aser temelenshi asoshi noktakba yimyim ka lir ta angatetdi.

Clean Election maparen nung tesayuba tongtibangtem:

1. Vote sen yong mayoktsü
2. Mapa/tajangzük angutsü mechi vote magütsütsü
3. Pei vote dak alaka tangar vote magütsütsü
4. Election Camp meyanglutsü
5. Senso Candidate meshimtsü

Clean Election atema inyakyim balala inyaka aruba rongnung kar:

- * Pledge card yanglua tenangzükba agidaksü
- * Youth Bike Rally Clean Election Yimyim ayimoktsü
- * Election sermon yanglua nübortem nem lema agütsü
- * Candidate jadena parnok nem pei nükjidong shidakja sarasadem agütsü
- * Clean Election Sunday amungba den sarasadem yinzü ayongzüka agi
- * Clean Election ken yanglua iba ken ajanga ochi election atema kuli asü
- * CD yanglua Clean Election Ministry inyak
- * Takoker Khristan ka ta sayutsü asoshi election nung ochi shia shilem agitsü temaitsü pei kidang wako temsüng asong
- * Asen Aortem asoshi Tir Yimyim nung anogo aika Clean Election atema tayongzükba agütsü.
- * Clean Election ya Arogo tebilemtsü dangbo masü anungji Election Commission-ia shilem tajung agitsüla ta ayimokja liasü.

NBCC & ABAM CLEAN ELECTION: Inyaka Aruba Nung Takok Aser Tamakok

NBCC aser ABAM ajanga Clean Election sentong agiba ya mapang shitak nung nübortem nem tangatetba agütsütsü merangba mapa lir. Iba mapa inyaka aruba nung takok aser tamakok asadangtsübaji kanga nungdak aser tongtibang kechiyong ibai ajanga tarutsü nung shilem tajungba agitettsü. Clean Election sentong takok aser tamakok asadangtsü atema, (a) tang state government-i lokti terenlok mapatem inyakba jenjang, (b) tatar yimsüsürtem taküm yimya aser jakla aser (c) nübortem taküm aser kibong tia asadanga shisadangogo, kechiyong Clean Election sentong nükjidongji yimden yimsüsüba (government) tajung ka kümdaksütsü asoshi lir.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

Pope Francis-i Iraq nung ISIS-i raksatsüba Tenla kitem semdang



March 07, 2021 nü Mosul yimti tejenba nung aliba 'Church Square' nung Pope Francis-i rara mapang nung asürtem bilemteta sarasademba noksa nung angur.

March 07, 2021: Amongnü Pope Francis-i northern Iraq nung tamalen Islamic State kiralongrartemi raksatsüba Tenla kitem semdanga item tesem nung sarasadem.

Pope Francis-i Iraq semdanga ajanga linük nung anünga aliba Khristantemi linük toktsür maotsü atema ajungmesotsüa akok ta bilemer.

Pope Francis-i Honibarnü Iraq nung Shia Muslim tongti putir, Grand Ayatollah Ali al-Sistani densema Muslim lenirtem ajurua tamangba yimsü balala amangertem tsüingda akhümtsübutep alitsü aser adianu ama alitsü ayongzüka liasü.

Amongnü Francis, Mosul yimtii aoba sülen Iraq nung rara mapang asürtem bilemteta sarasademogo.

IS kiralongrartem den raradang raksaba Tenla ki pezüi longbanga aliba yimti tiyong 'Church Square' nung sabang ka yanglur loktii pa agizükba sülen sentong agia liasü.

2014 küm June ita nung IS kiralongrartemi Mosul yimti agia 'caliphate' sangdong. Iba mapang nungji Mosul nung aliba al-Nuri mosque nungi IS lenir, Abu Bakr al-Baghdadi-i Muslim nunger ajak dang pa "caliph" ama agizüksü tuyua

liasü.

Mosul yimti ya IS telok atema tongtoret ama aküm, ajisüaka ita 9 tashi raraba sülen 2017 küm July ita nung Mosul yimti nung IS kiralongrartem maakdoka liasü.

Iba mapang nungji nisung 9,000 nungi 11,000 tsüingda asü aser 2019 küm Syria nung US sepaitemi Baghdadi tepseta liasü.

Kasa anogo nungsa Pope Francis helicopter ajanga Nineveh-i ao aser Qaraqosh nung Khristantem ajuru. 2014 küm Khristantem aikati iba tesem toktsür ajen ajisüaka karbo meyipa aruogo. Idakji pai Khristantem den jembia aser Immaculate Conception Arogo Tenla kidang tekülem sentong agi. Iba Tenla ki ya IS-i rongdokja liasü saka tawa yanglushiogo.

Amongnü nikongdang Erbil nung aliba stadium ka nung pai Khristantem ajuru aser tekülem sentong agia liasü. Iba sentong nung nisung 10,000 shi aden.

2017 küm Iraq-i ISIS madak takok anguba sangdong aser tangbo IS kübok tesem ka danga mali, saka tang tashi parnokki mapang shia tesem balala amaker.

Iraq nung IS telok merenba mapang nung tamajungtiba

kongshirtemji Khristantem liasü. Kiralongrartemi Khristantem dang tamangba yimsü meyiptsüla mesüra saru agütsütsüla ta tuyua liasü. Iba mapang nungji Khristan aikati pei ki aser Arogotem toktsür ajen.

2003 küm tashi nung Iraq nung Khristan nütsüing million 1.5 shi liasü saka tangbo lakh 4 (4,00000) shi dang kümogo.

Iraq nung küm aika rara liasü saka Pope-i Iraq semdanga ajanga loktiliba nung taneptsü angutsü, ta teimla nung 2019 küm Iraq-i Pope Francis dang linük semdangtsü asüingdanga liasü.

March 5, 2021 nikongdang Pope, Baghdad tonga aru aser pai Iraq Tir, Barham Salih ajuruba sülen linük yimtiba nung aliba Syrian Catholic Cathedral of Our Lady of Salvation nung Arogo lenirtem ajuruogo.

March 6, 2021 nü pa Najaf-i oa linük nung Shia Muslim lenir, Grand Ayatollah ajuruba sülen Ur nung tamangba lokti balala senden nung aden. Pa maneni Baghdad-i aruba sülen Chaldean Cathedral of St Joseph Tenla kidang tekülem sentong nung aden.

Tesüsa pa March 8 nü Rome-i meyipa aotsü.

Boko Haram kiralongrartemi Pastor Bulus Yikura chiokogo

March 07, 2021: Bodhbar aonung (March 3, 2021) Nigeria linük nung Boko Haram kiralongrar teloki pastor, Bulus Yikura chiokogo; kiralongrartemi pastor Yikura ya yaküm December 24 nü Borno State nung pua liasü.

Tawa Boko Haram teloki video ka ajanga, parnokki akhangba ama parnok nem sen magütsüra March 3, 2021 nü parnokki pastor Yikura tepsettsü, ta amokmerena liasü, ajisüaka pa tepsettsü ghonda ishika dang lia pa chiokogo.

December 24, 2020 nü kiralongrartemi Borno State kübok Chibok amakba mapang nung Pastor Yikura puer aoba sülen March 3, 2021 nikongdang 6:15 ako meta parnokki pastor ji state security office ka tashi anir aruja liasü.

Security sepaitemi ashiba agi, Yikura'er kibong aser EYN Arogoi taoba hopta nungi tenzüka pa chioktsü atema kiralongrartem den jembia liasü.

Pa chiokba sülen osangbener den jembidang pai, "Ni Tsüingrem dang pelar, ni Tsüingrem dang pelar," ta dang ashi.

United States nung aliba Save the Persecuted Christians nung executive director, Dede Laugesen-ibo, EYN Arogoi kiralongrartemi akhangba ama senji agütsür asütsüa akok, ta ashi.

Laugesen-i, "Pa chiokba aser Zamfara nung tanurtem chiokba atema onok pelar, ajisüaka 2019 küm nungi Nigeria nung nisung puer oa nisung melen sen meshiba ya kanga bulua atalokdar, iba atemaji onoki teblemstsü akar," ta ashi.

Tawa Boko Haram teloki sayaba video nungji Brethren in Nigeria (EYN) Arogo nung pastor, Yikura-i sorkar aser Arogo lenirtem dang pa chioktsü atema inyakdaksüner, ta mepishia lir.

February 24 nü video nungji pastor-i, "Ni linük Tir, Muhammadu Buhari aser Borno State Angh na dang ni yaritsü mepishir, kechiyong tanü, February 24 nü kü nem hopta ka mapang agütsüogo. Nenoki ni mesüdaksünüra Tir ka ama, Angh ka ama aser local government chairman ka ama ni kümzüakang ta ni mepishir," ta mepishia liasü.

Taoba hopta Nigeria nung kiralongrartemi school azünger tetsür 300 shi pua liasü saka Mongolbarnü parnok ajak chiokogo.

ANOGO ABEN TSÜNGREM DEN

LENISÜBA TANELA

"Ochi Tanelai nenok ajak ochiba dangi anitsü." Yohan 16:13

Tanabuba tangatetba tanelaji, Tanela Temeshi Kibuba Yisui Tanela Temeshiji asenok Teyarir aser Lenir ta metetdaksü. Pai asenok ochiba dangi anitsü. (Yn. 16:13).

Tanela Temeshiji tamanger shia dak alir aser tzüra temdaksür. Kodang tesayuba Tsüingrem nungi mesüilir idakji jangratem aser tipdem ka malitsü. Iba indang tenyar Yohani tejanga ashi. "Shirnoki nenok mashileni anisar, parnok indang ni item o nenok dangi zülüogo. Pa nungi nenoki kechi mezüja shimtetba angu, aji nenok dak alinung, kari nenok dang sayutsü, aji nenok tenüingdaksü maka. Saka Pai mezüja shimtetba jagi kechisarena indang nenok dang sayu nung, aser aji ochi asünung, tiyazü masü, aser aji agi nenok dang koda sayu, aji oda nenok dak liang" (1 Yn. 2:26,27). Iba osang yagi arogo nung tamangertem aintsü sayuba indang mashir (Ef. 4:11-13). Saka arogo nung tiyazü tesayurtem, shirnoki na ashioksütsü meranger parnok indang jembir.

Tanela Temeshi asenok nem tiyazü tesayuba anema tekümdangtsü agütsür (1 Tim. 4:1). Tamanger kari tiyazü tesayuba kar mesüra jungkai adokba kar Khristan telok nung amshitsü merangdir pai Tanela Temeshi jashidaksüra! Pai "tatok makaba temenen" menar! Iba yagi Lucifer nem masadangtetba maongka agütsür. Tanela Temeshiji ochi tanela, anungji tiyazü tesayuba agi pa peladaksütsü makok.

Pauli 1 Tesalonikia 5:19-22 nung Tanela remsepdaksüba mapa asem sayur.

- 1) Sayutsüingiba mezüingmeshi masütsü
- 2) Ajak tendanger tajungba ametang
- 3) Tamajung kechisarena nung pilaa liang. Tesalonika

arogo nung Grik nunger süngyanglu külemba yimya tesayuba kar lir ta Pauli putet (Tesa. 3:5). Junga mangateti sayutsüingiba ajanga Asentenshi sayutsüingidang sayutsüingiri mezüingbuba onük nungji aibelener. Metendangi agizükba aser tamajung nungi pilaa maliba jagi ajemaluba Tsüingrem Tanela tali jashidaksüra, aser asenok dak aliba Tanelaji remsemdaksür, tangar tanelatem ajak sakdaksür. Tanela Temeshi-i ola matoki tangar tanelatem inyakba ajia dangbo malitsü. Pa tenük meyiba Tanela lir!

Tanela Temeshi arung, kechiaser Na ajanga ainkartemi zülü aser jembia, ochiji lapokang, Na sapi lir, Temeshi Kaketji lapokang! (Charles Wesley, 1707-1788).

Sri Lanka nung Arogotemi 'Black Sunday' ayonga among

Colombo, March 07, 2021 Lanka (MCSL)-i Khristantem (Agencies): 2019 küm Sri Lanka nung Easter Sunday anogo nung Easter Sunday anogo nung kiralongrartemi Tenla kitem amakba mapang asürtem atema ochi temeden agüjang, ta takhangba agüja Amongnü (March 7) Sri Lanka Arogoi "Black Sunday" mongogo.

2019 küm Easter Sunday nü kiralongrartemi bomb amshia Tenla ki asem den hotel kar amakba mapang nung Khristantem timba ser bendanger 40 densema nisung 270 jungnüa asü.

Amongnü anepdang 8:45 ako nung Colombo anasa Kochchikade nung aliba St. Anthony Tenla kidang tsüingtsüing atem. 2019 küm April 21 nü 8:45 ako shidak nung bomb pokdakja liasü.

Asürtem bilemteta Roman Catholic Arogotem nung amangbapurtemi süoshi tanak semer bomb lendong agütsürtem nem temerenshi agüjang ta takhangba agütsü. Khristantem pusema Buddhists, Hindu aser Muslim nungeria longkak aita shilem agiogo.

Muslim Council of Sri Lanka (MCSL)-i Khristantem pusema sorkar dang Easter anogo nung bomb lendong tatalokba bushisüingdanga asalentong yanglurtem nem temerenshi agütsütsüla, ta takhangba agütsü. Presidential commission of inquiry-i agütsüba report agi Khristantem melung masür, kechiyong iba report nungji aibelenerem jangjaba osang mali. Colombo nung tongti putir, Malcolm Ranjith-i sorkar dang presidential report ji parnok nem-a agüjang ta mepiogo. Commission-i iba report ya February 23 nü Parliament Speaker nem agütsü.

Linük Tir, Gotabaya Rajapaksa-i iba report reprangshitsü atema Tourism Minister Prasanna Ranatunga nem mapa nunglokja liasü aser minister-ia pai iba report agi melung masür, ta shiogo. Minister-i, "Onoki iba report ashishir. Lendong agütsütsü atema asalentong yanglur tongtiji Commission-i meputet asü? Mesüra nenoki mimshir? Iba report agi ni melung masür," ta metetdaksü.

OLONG PAITEP # 5746

1		2		3		4	5			
				6						7
		8								
9				10		11				
			12						13	
						14				
16						17				

TIPIEN 1. Nisung jenti - (5) 4. Tsük rudenba - (5) 6. Temzüng tesashi - (5) 8. S _ _ _ i - (3) 9. Nisung telemsa - (3) 10. Anogoshi - (4) 12. Ajanga aor - (4) 13. Tsük rizüngdak - (3) 14. Tebang nungi adokba - (3) 16. Süngdong tatembangtiba - (5) 17. Meputep - (5)	LANGTSÜNGLEN 1. Tenük telong - (9) 2. Committee dang ajar - (5) 3. Yagi ki okdoker - (7) 5. Yim lenmang - (5) 7. Temoatsü keter meyipa aruba - (9) 11. Kanga junga menemba - (7) 12. Majinü - (5) 13. Tzuma nung senzuba - (5)
--	---

OLONG PAITEP # 5745 TELANGZÜBA

TIPIEN : 2. Bangsemo, 6. Tiptem, 8. Jen, 9. Talila, 11. Aren, 12. Tzübo, 14. Alia, 16. Angati, 17. Odi, 18. Azü, 19. Sünglang.	LANGTSÜNGLEN : 1. Yipten, 3. Nüja, 4. Sangro, 5. Milen, 7. Tulu, 10. Laza, 11. Aben, 12. Tiyong, 13. Ajizük, 14. Aitsü, 15. Tasa, 16. Aina.
---	---



SINGARA NUNG TAPOK MALI SÜR NUNG SINGARA TELONG NUNG MOTORJANG, HALDI & MASALA INOKA ALIBA YA NGUR ALOKBA O JABASO NA SÜNGMANGÜTA JÜMBITEPER.

Jabaso : Oba! Singara nung tapok mali sür nung telong nung motorjang, haldi & masala aliba ya koda sür telongi ai?

Alokba : Whoa whoa tebu! Nai ang masü, obala-a kangasa süngmanger. Ano singara kar nungbo motorjang amala dang masü, alo ajupsar aser iba den peas (onion) alangsar inoka alir nung koda. Ya tesüngmangtsü mapa masü no? Kichiaser singara nung tapok mali.

Jabaso : Oba ! iba ya aseni tamasa bushiteter asütsü südi na? Kichiaser tang tashi nung tangar kin shingaia iba indang ya jümbia mangashi.

Alokba : Tebu! Nai ashi amaji iba ya anati tama bushiteter asütsü. Arung, anabo asen yimer ajak jazüker ozü jabaso künati science tasen ya nguteta lir aser ibaji singara nung tapok mali sür nung koda sür telongi motorjang aser haldi & masala na ai ta bushiteta lir asen ajaki study südi ta parnok dang shidi. Iba studyji kodang tinzükdir yimer ajak süngmangtsü.

Lili zülur. S. Medem Kichu, Kohima

TANÜBO NAI LANGZÜANG

Q. 78th Golden Global Awards nung koba sabang ajanga nominee imba angu?
A. Netflix B. Amazon Prime C. Walt Disney D. None
(Taruba adok nung onoki langzüsü)

YASHI ADOK TELANGZÜBA : 1930

AO OSHI ANGAZÜKDAK:
TANÜ ANGAZÜKTSÜBA OJANG

Anak
(v.) Temzüng agi ayishiba (scratch)
* Pai kü tejak nung anak.

Anak
(n.) Süoshi, kiojen aser osettsüset menendaktsüba auyi (dirt)
* Ozü ki anak agi sünga lir.



NAI-A YA METETTER MA?

- MARCH ITA AMAZON PRIME SABANG AJANGA SAYUTSÜ ALIBA MOVIE ASER SHOW TEM:**
- Grab a Hunk of Lightning
 - American Psycho
 - Dorthy & the Wizard of Oz, Season 1
 - Ella the Elephant, Season 1
 - The Paris Murders, Season 1
 - Still Alice
 - The Switch
 - Out Of Africa
 - Coming 2 America (Amazon original movie)
 - Jack And Jill
 - Honest Thief
 - Making Their Mark, Season 1 (Amazon original)
 - Pride + Prejudice + Zombies
 - The Dilemma
 - Words On Bathroom Walls
 - No Strings Attached
 - Invincible, Season 1 (Amazon original)
 - La Templanza (The Vineyard), Season 1 (Amazon original)
 - Renegades
 - The Ghost Writer

SUDOKU # 5787 TELANGZUBA # 5786

1			6		4	5	4	9	7	8	2	5	6	3	1		
9	2		5			3	1	1	6	2	9	7	3	8	4	5	
	4	8						8	5	3	6	1	4	7	2	9	
7			9		1			2	7	1	4	5	6	9	8	3	
			8		9			6	8	4	2	3	9	1	5	7	
			2	5			7	5	3	9	1	8	7	2	6	4	
6	5				9	3	1	8	3	2	5	7	6	1	4	9	8
3				1		5		4	7	4	6	5	9	8	3	1	2
		4				6	2	9	9	1	8	3	4	2	5	7	6

OJANG LUTEP # 5333

- ULOLU :
- MAA :
- NGDA :
- ASANGHI :
- KASA :
- IMLMEAI :
- KTSDOÜBA :
- NGSASAANG :
- GNUN :
- TALAOK :

OJANG LUTEP TELANGZÜBA # 5332

TELOK NUNG SHIR NEM KECHI TAGÜTSÜTSÜ TIM AJAKJI ABENSAA ATAJANG

TAN HOPTA ATEMA - KOMA SÜLA ?

Q. Asenok sobaliba nung ali senmang amangtepba yimya ya, akhi tsürabur senmang aser tanü putu senmang ta ana küma bendanger amangtsü tenzük nunga koma süla?



Kolkata, March 07, 2021: West Bengal assembly election nüboyim sentong nung adentsü atema Amongnü Ato kilonser, Narendra Modi Kolkata nung aliba Parade Ground tonga arudang tangokba noksa nung angur.

Tanü Parliament nung Budget senden tanabuba shilem tenzüksü

New Delhi, March 07 (Agencies): Hombar nungi tenzuka Parliament Budget senden tanabuba shilem tenzüksü aser senden nung coronavirus dak sendakba telatetba ajak benshitsu.

January 29 nü linük Tir, Ram Nath Kovind-i House anaprong külem senden nung jembia budget senden mezüngbuba tenzuka liasü aser February 29 nü tembang.

February 1, 2021 nü Parliament nung Union Finance Minister, Nirmala Sitharaman-i Union Budget 2021-22 benoka liasü.

Rajya Sabha senden anepdang 9:00 ako nungi nikonngang 2:00 ako tashi agitsü aser Lok Sabha senden

nikongdang 4:00 ako nungi aonung 10:00 ako tashi agitsü. Budget senden tanabuba shilem ya April 8 nü tembangsü, ta Lok Sabha Speaker, Om Birla-i metetdaksü.

Budget Session 2021 mezüngbuba shilem nung Lok Sabha nung senden ghonda 49 ser minute 17 mena liasü, ta Speaker-i metetdaksü.

Om Birla-i, "Tir onük nung ajemdaker o lemtepa nung züngsem 130-i ghonda 16 ser minute 39 shilem agi. Union Budget 2021-2022 nung o tokteptsü atema ghonda 10 lenzükja liasü saka House nung ghonda 14 ser minute 40 o toktepa liasü. Union Budget 2021-2022 nung o lemtepa mapang züngsem 117-i shilem

agi aser züngsem 173-i Zero Hour mapang nung shilem agia liasü. Senden nung rongrong adokba ajanga minute 43 amajok nung indok," ta metetdaksü.

"Parliament complex telung nung MP tem coronavirus vaccine agitsü atema vaccination centre ka amenokogo," ta Lok Sabha bulletin ajanga metetdaksü.

National Expert Group on Vaccine Administration for COVID-19 (NEGAVAC) tetuyuba nung ajemdaker arrshi küm 60 dang nungi temapur MP tem-i vaccine agitsü temsüa lir.

Parliamentary data nung shia aliba agi, Lok Sabha nung MP shilem 36 aser Rajya Sabha nung MP shilem 62 bo arrshi küm 60 dang nungi temapurtem lir.

Aluyimba ozüng magien tashi onoki longkak aittsü: Rakesh Tikait

New Delhi, March 07 (Agencies): Aluyimertem lenir, Rakesh Tikait-i, Centre sorkari aluyimba ozüng tasen asem magien tashi aluyimertemi maneni longkak aittsü, ta metetdaksü.

Uttar Pradesh kübok Ramrajn jila nung lokti senden nung jembidang BKU lenir, Tikait-i, aluyimertemi ozüng tasen asemprongla agientsü atema akhanger, aser sorkari onok akhangba mataloktsü tashi aluyimertemi longkak aittsü, ta metetdaksü.

Aluyimertemi Delhi arrstülen longkak aitba tenzükter anogo 100 abensaba nüngtem nung Tikait-i tractors rally ka

tenzüksü. Iba sentong nung jembidang Tikait-i, pai Uttar Pradesh aser Uttarakhand na nung district aika sema senzüba sülen March 27 nü Ghazipur nung aluyimertem longkak aitba tesem tonga aotsü, ta metetdaksü.

Ano külen Union Minister of state for Agriculture & Food Processing aser Muzaffarnagar nungi MP, Sanjeev Kumar Balyan-ibo, aluyimba ozüng tasen asem ya ajanga aluyimertem tajanzük angutsü, ta ashi.

"Aluyimba ozüngtem ajanga aluyimer kar dang nungi danga ali agira ni MP menden nungi anentsü. Aluyimertemi aginüba

ama item ozüng yanglu," ta Minister-i ashi.

November ita tatembanglen nungi tenzuka aluyimertem meyirjang aika Delhi arrstülen tesem balala nung adenshia aluyimba ozüng tasen asemprong agienang ta takhangba agütsüdar.

Item ozüng ajanga aluyimertem nem sorkari agütsüba minimum support price (MSP) anentsüa akok ta aluyimertemi tsübur.

Ajisüaka Centre sorkaribo, aluyimba ozüng tasen asem ajanga aluyimertem nem maongka tasen aika agütsütsü aser aluyimba sector nung technology tasen aika amshitsu, ta ashir.



Meerut, March 07, 2021: Amongnü Meerut district kübok Kaili nung Congress General Secretary Priyanka Gandhi-i aluyimertem senden- Kisan Mahapanchayat nung jembidang tangokba noksa nung angur.

Tamil Nadu election atema DMK-i Congress nem menden 25 agütsü

Chennai, March 07 (Agencies): Tamil Nadu nung assembly election agitsü Congress aser DMK nati tembangogo; DMK-i Congress nem menden 25 agütsür aser Kanyakumari Lok Sabha by election nung tokteptsü atema Congress nem maongka agütsüogo.

Kanyakumari Lok Sabha menden nungi MP teinyakdak, H Vasanthakumar asüba ajanga iba menden tazüng aküm.

Tamil Nadu nung Congress-i menden 45 aginüa liasü saka DMK-i Congress nem menden 21 tashi dang agütsütsü ta tekong meranga liasü, saka tatesa Congress nem menden 25 agütsüogo, ta osang ka ajanga metetdaksü.

Osangbener den jembidang

Tamil Nadu Congress Committee Tir, Alagiri-i, "Congress aser DMK tsüngda menden alemba maparen junga tembangogo. Onok tamalen nungi teloktep liasü aser iba onük (menden alemba) junga tembangogo. Menden alemba mapang nung mangatettep karbosa adoker, saka iba dakji alaka timtem kecha maliasü. Congress aser DMK na teloktep loksadar ta jembiba osangji khenyongi tai," ta metetdaksü.

Menden alemba tezüngzüktep nungji DMK Tir, MK Stalin aser Tamil Nadu Congress Committee (TNCC) Tir, KS Alagiri nati sign süogo.

Tamil Nadu nung assembly menden 234 atema April 6 nü election agitsü aser May 2 nü vote zünga election osang sangdongtsü.



Kanyakumari, March 07, 2021: Amongnü Kanyakumari nung Tamil Nadu Assembly election atema BJP-i nüboyim sentong tenzükba mapang Union Home Minister, Amit Shah-i party pusemertem ajuruba noksa nung angur.

Bengal terenlok atema taruba küm 5 ji kanga tongtibang asütsü: Modi

Kolkata/New Delhi, March 07 (Agencies): West Bengal nung assembly election agitsü joko mapang ana nung lia Amongnü Kolkata nung Ato kilonser, Narendra Modi-i BJP pur election nüboyim sentong ka nung jembigo.

March 27, 2021 nungi tenzuka shilem ti lemsar Bengal nung assembly elections agitsü.

Amongnü Ato kilonser, Modi sentong agitsü tesem, Brigade Parade Ground tonga marudang Bollywood actor tain, Mithun Chakraborty-i BJP nung aden.

Nüboyim sentong nung jembidang Modi-i, "Onoki chichiba temelenshi bener arutsütsü, kong ajak renloktsü saka shinga memesüzüksü aser bendangertem aruba anendaksütsü," ta ashi.

West Bengal Chief Minister Mamata Banerjee aser lai aniba party TMC aija Modi-i, "Iba Brigade Parade Ground nung lenirtem aikati jembigo aser West Bengal terenlok nung tetsükdaksü agütsürtemia jembigo. Bengal nüburtemi temelenshi aginüa maneni imlar. Temelenshi bener arutsü atema Bengal nüburtemi

Mamata dak tamang kaa liasü, ajisüaka Didi (Mamata) aser lar nisungtemi nüburtemi imlabaji mataloktsü," ta ashi.

"Taruba assembly elections nung TMC, Left aser Congress lir aser külen Bengal nungertem lir. Onoki 'Sonar bangla' nükjidong ataloktsütsü. Bengal nung terenlok alitsü, yangi sen jenti indoktsü, Bengal nunger sorbaliba kümzüksü aser temelenshi bener arutsütsü, ta nenok dang nangzüksü atema tanü ni yagi aruogo," ta pai ashi.

"Bengal nung terenlok alitsü atema taruba küm 5 ji kanga tongtibang asütsü. Taruba küm 25 tsüngda state terenlok atema foundation yanglutsü asoshi taruba küm 5 ji kanga tongtibang asütsü. India nunger nüchiso ngur sülen küm 100 ajungba küm- 2047 küm tashi nung Bengal-i ano tanaben linük anitsü," ta Ato kilonser ashi.

"Yangi democratic inyakyim raksatsüba nenoki jungjunga meteta lir. BJP-i iba inyakyim tashi itdaksütsü. Sorkar inyakyim, police aser yimsüsübaren nung nüburtemi melung lemtettsüsa onoki temelenshi bener arutsütsü," ta paisa nangzük.

Myanmar nung Deobarnü maneni nüburtem aika adenshia longka ait



Deobarnü nüburtemi taoba ita military-i sorkar atsüngtokba anema longkak aitba noksa nung angur.

Yangon, Metsüremi/March 7 (Agencies): Honibar aonung security forces temi Yangon yimti nung longkak aiter lenirtem putena aoba sülena Myanmar nung Deobarnü nüburtem meyirejang aikati taoba ita military-i sorkar atsüngtokba anema longkak aitogo.

Mandalay nung nüburtem timba adenshia longkak aita liasü, ta local media sangdong ajanga metetdaksü. Kasa mapang nung Yangon yimti, India den arrtsü anasa Kale yimti aser Dawei yimti nunga nüburtem aika adenshia longkak aitogo, ajisüaka mepetmesü adokba osang kecha mali.

February 1 nü military-i, election ajanga shimba lenir Aung San Suu Kyi atsüngtokba sülen Myanmar nung mangatetep tulu adoka arudar. February ita nungi anogoshia longkak aitba ajanga shishilemba nung kongshiba den administration lemtaogo aser United Nations-i ashiba agi, security forces-i nisung 50 dak tema tepsetogo.

Deobar anepdang Yangon yimti nung alirtemi ashiba agi, army aser police tem Yimti kübok district balalai injang kha ao. Parnoki Kyauktada jila nung alir asem apu, ajisüaka parnok apuba kuli mejangja.

"Parnoki kübo aser küti meshir. Shingaia onok nem teyari magütsü na? nenoki kübo aser küti dak tedangshi. Parnok pur onüra onoka dena pur oang," ta actor ka aser par jabaso pur aoba mapang tetsür kati ayima ashi.

Sepaitemi Suu Kyi-i aniba National League for Democracy party okatsür ka dena bushia aru, ajisüaka pa mangu, ta parliament züngsem Sithu Maung-i

Facebook ajanga metetdaksü. Honibarnü sepaitemi nisung 1,700 dak tema puogo, ta Assistance Association for Political Prisoners advocacy group-i metetdaksü. Ajisüaka Honibar aonung pur aoba indangbo parnok melemsatep.

"Sepaitemi pur aoertem dak teka sangshiba den military boots agi metsü, sung agi azük aser police garitem nung anir ao," ta AAPP-i ashi. "Security forces tem nüburtem aliba tesemi ai aser longkak aitertem pur aotsü merangba den parnok kidang injang khalokja ki aika raksatsü."

Kasa mapang nung Yangon nung amendaker aliba activist Maung Saungkha-i ashiba agi, yimti balala nung longkak aitba ya anogo ana atema general strike ayongzükba nung shilem ka lir. "Linük asoshi taküm bendanga agütsütsü onoki mulunga lir. Tang tensa ya taoba mapang dang nungi tamajungba. Anungji iba tia nung dang alitsü asü meyiper raratsü? Tangbo akoktsü atema raratsüla," ta pai ashi.

State meyong osang kaket kati Deobarnü longkak aitba sentong nung shilem magitsü atema nüburtem amokmerenogo. "Pai tanurtem tarutsü meraksatsütsü atema nüburtemi longkak aitba sentong nung shilem magitsü atema kanga kümdangtsüla," ta Global New Light sangdong ka nung shia lir.

Junta-isa, civil servants tem dang parnok maneni mapa sentokra Hombarnü nungi parnok mapa nungi agin tenzüktü ta amokmerenogo. Yangon kübok Okkalapa tesem nung kentenerem adenshi parnok Suu Kyi indang t-shirts semer revolutionary kentem tena liasü.

"Adianutem asenok longjemtsü kanga tongtibang," ta lokti-i ken aten. Kasa mapang nung Mandalay nunga nüburtem aika adenshia longkak aitogo, kong nüburtemi 'military tetenzük' ta ayimtenba mapang security forces temi tear gas khalokja liasü.

Maneni Monk tem-ia yimti nung mener longkak aita liasü. Parnoki, "onoki military junta maginer," ta zülua amer longkak ait. Honibarnü yimti nung ano lanur ka süogo, shiba tetsüng nung injang agi akha aser security force-i azükba ajanga asü.

Myanmar ketdangsertemi Honibarnü ashiba agi, parnoki arishi küm 19 tain Kyal Sin tasü mang tutetogo, shiba Mandalay nung Bodhbarnü "Everything will be OK" ta zülur aliba T-shirt ka semer longkak aita aliba mapang khaset. La ya longkak aitertem nükrangtong kümogo.

State meyong MRTV-i ashiba agi, bushitsüngdangba sülen la police temi khaset masü ta ngutetogo, kechiyong pa kolak nung injang tanga ka ngutet aser la dak tesülen nungi khaa liasü aser police tembo tejaklen liasü.

Iba anogo tangokba noksa ajanga la mekhaset tsüngda la security forces tsütsü tesülen tongloksür oya aliba sayuogo. Coup anemertemi iba ken o meimbangtsü merangba atema ketdangsertem aitsüogo.

Nisung tepsetba ajanga alima linüktem aika mepelar. United States aser anüolen aliba linüktem kari junta nem tenokdangba agütsüogo. Kasa mapang nung China-i tanga linüktemi telung ken o nung mejushitsüla ta shiogo.

Latin America nung COVID azüoktsü merangba maginer

Asuncion, Metsüremi/March 07 (Agencies): Coronavirus tashidak wara azüoktsü mechi tenokdangba tesashiba agütsüba ajanga mepela Latin America linük kar nung nüburtem longkak aiter.

Sorkari coronavirus timtem azüoktsü merangba anema longkak aitdak rongrong adokba sülen Paraguay Tir, Mario Abdo Benitez-i cabinet minister ajak dang Deobarnü mapa nungi anendang, ta shiogo.

Nüburtemi akhangba langzúa Benitez-i iba telangzúa ya agütsü, ta Communications Minister Juan Manuel Brunetti-i osangbener dang ashi.

Hokulbar nikongdang linük yimtiba, Asuncion nung security forces temi longkak aiter dak rubber bullets aser tear gas amshi aser longkak aiter temi sepaitem dak long agi aon.

Honibar aonunga Asuncion aser Ciudad del Este nung maneni longkak ait, kong police temi water cannon amshi aser longkak aiter temi long agi aon.

Hokulbarnü tashinung Paraguay nung coronavirus agi nisung 165,811 meneper aser nisung 3,278 sür liasü.

Iba linük nung World Health Organization ajanga lemzüksüba ama COVAX scheme nungi mozü doses million pezü aser Russian Sputnik V nungi doses million ka arutsü ataba mapang lir,

kong nütsüng yongsük million tenet dang tera agi timba lir. Argentina nunga coronavirus mechi tenokdangba agütsüba anema longkak aiter.

Provincial capital, Formosa nung tawa tashidak wara tali pokloka aoba azüoktsü mechi business kar shibangtsüba ajanga longkak ait tenzük, kong police temi rubber bullet aser tear gas amshia liasü.

Police temi tashiyim amshiba ajanga nüburtem yirur aser aika puogo, ta United Nations High Commissioner for Human Rights (OHCHR) indang regional office aser Argentina nung aliba resident coordinator for the UN ajanga sangdong ka nung ashi.

Police temi longkak aiter aser osangbener dak rubber pellets, tear gas aser süng amshiba atema khuret abener, ta Inter-American Commission on Human Rights ajanga Twitter nung ashi.

Kasa mapang Brazil kübok Rio de Janeiro nunga COVID-19 tashidak azüoktsü mechi Brehostibarnü nungi tenzuka bar, restaurant aser tzükum nung tenokdangba agütsüogo, kong mozüki sünga shiranger lir.

Taoba hopta Brazil nung anogoshi COVID-19 agi nisung 1,300 dak tema asü, ta health ministry ajanga ashi.

Tang tashinung Brazil nung COVID-19 agi nisung 260,000 jungnüa süogo.

China-i Tibet den Bullet Trains agi sendakteptsü

Beijing, Metsüremi/March 07 (Agencies): China-i taküm July ita matongdangsa Arunachal Pradesh nung India nung arrtsü anasa Tibet tashi bullet train tem senzüdaksütsü, aser ibai China nung mainland provincial-level region ajanga nung kanga kera jajaba train service telapoker asütsü, ta ketdangsür kati ashi.

Regional capital, Lhasa tashi train lenmang kilometer 435 talang nungya Fuxing high-speed train tem jajatsü, koba nung internal-combustion aser electricity ajanga tashi agütsür, ta China State Railway Group Company Limited indang board chairman, Lu Dongfu-i Xinhua news agency dang Honibarnü ashi.

Lhasa aser Tibet anüodklen Nyingchi sendaktepba railway line ya 2014 küm nungi yanglu tenzük. Tibet nung electric railroad ibai mezüngbuba alitsü aser iba ya 2021 küm June ita nungi amshi tenzüktü sentong lir. Lenmang yangluba maparen ya 2020 küm tatemlen renema liasü, ta osang ajanga ashir.

Iba railway ya ghonda ka nung kilometer 160 tashi jajatsü akoker, ta Tibet Railway Construction Company Limited ajanga ashir, koba China State Railway Group indang subsidiary ka lir. China nung 2025 küm tashinung high-speed train network indang lenmang ya kilometer 50,000 shi kümdaktsür alitsü nükjidong lir, koba 2020 küm tatem tashinung kilometer 37,900 liasü, ta Lu-i ashi.

Iba high-speed railway network yagi China nung yimti shilem 98 den nisung 500,000 awabangtsü, ta pai ashi. China nung pari yangluba Fuxing train ya tang ghonda ka nung kilometer 160 nungi 350 tashi nung kera jajar, ta Lu-i ashi.

China-i linük southeast Tibet Autonomous Region nung train network renema meta talang nung aliba tesemtem mainland China den sendaktepdaktsür. Arunachal Pradesh anasa Tibet nung Lhasa aser Nyingchi yimti sendaktepba railway line ya nung lenmang yangluba maparen taoba küm December ita tembanga liasü.

Washington kübok Georgetown nung aliba Holy Trinity Catholic Church nung Mass agidak asentsü asoshi US Tir Joe Biden aruba mapang tangokba noksa ka yangi angur.



Rao aser Bhumi nati Badhaai Do tangokzükogo



Mumbai, Metsüremi/March 07, 2021 (Agencies): Actor Rajkummar Rao aser Bhumi Pednekar nati tena indang taruba film Badhaai Do tangokmaogo. Rajkummar-i Instagram sabang ajanga Bhumi aser iba film director Harshvardhan Kulkarni na den külemi tangokba noksa ka lemsatep.

maparen tembangogo. #BadhaaiDo film sayatsü asoshi yongyaseter!," ta noksa den Rajkummar-i iba olen lemsatepa liasü.

Kasa mapang, Bhumi-ia iba noksa ya Instagram ajanga lemsatepogo.

"Shardul aser Sumi na atema film tangokba maparen tembangogo. @rajkummar_rao aser #harshwardhankulkarni

den team ajungai takok ngua inyakogo. Kodanga mamatetsüsa nenoki yariba atema pelar," ta Bhumi-i lemsatep.

Badhaai Do ya Badhaai Ho franchise indang installment tanabuba alitsü. Mezüing film - Badhaai Ho nung Ayushmann Khurrana aser Sanya Malhotra, nati tongti shilem agiogo aser iba franchise maneni takok ngua bener aotsü atema tanabuba installment nung Bhumi aser Rajkummar nati shilem agiba angutsü.

Iba film ya Harshvardhan Kulkarni-i direct süogo. Gulshan Devaiah-i tongti shilem agiba comedy Hunter (2015) ya Kulkarni-i direct asüba ajaki jangjaa lir. Badhaai Do otsü ya Suman Adhikary aser Akshat Ghildial nati zülua liasü. Tenati mezüing film Badhaai Ho zülutsü.

India nung 'Mini Countryman Cooper S' saya

New Delhi, Metsüremi/March 07, 2021 (Agencies): BMW company meyong MINI-i India nung 'Countryman' variant ana - Cooper S aser Cooper S JCW sayaogo.

BMW Group Plant Chennai nung gari anaprongla yanglu aser MINI Countryman Cooper S jenjang sen 39,50,000 aser MINI Countryman Cooper S JCW jenjang sen 43,40,000 (ex-showroom) alitsü. Gari anaprongla mekaa ayutsü aser test drive atema MINI authorised dealer tem aser MINI Online Shop nung tongtepratepsü akok.

reprangdangra, MINI Countryman ya sentsü ana - White Silver aser Sage Green den sentsü pezü nung angutsü. Iba den külemi, gari tejaklen aser tesülen bumper, radiator grille, LED headlights tasen aser LED Rear Lights den Union Jack Design aser John Cooper Works Aerodynamic kit inoka yanglutsüogo.

Cabin telung nung 5.5-inch/13.97 cm Multifunction fully Digital Display, Malt Brown aser Satellite Grey sentsü Leather Chester Upholstery den colour line aser MINI Yours Interior Style Shaded Silver Illuminated interior surface trim angutsü.

MINI Countryman nung MINI TwinPower Turbo Technology den 2-litre 4-cylinder petrol engine inoka yanglutsüogo. Iba engine ajanga 5,000 - 6,000 rpm nung 192 hp/141 kW aser 1,350 - 4,600 rpm nung 280 Nm maximum torque agütsür. Second 7.5 nung 100 km/hr tashi kara aoer aser gari top speed ji 225 km/hr alitsü. Iba engine HP aser Torque achaayangtsü atema Cooper S nung 7-Speed Double Clutch Steptronic Transmission aser Cooper S JCW Inspired nung 7-Speed Double Clutch Steptronic Sport Transmission inokja lir.

Flipkart Smartphone Carnival Sale tenzükogo

New Delhi, Metsüremi/March 07, 2021 (Agencies): India nung March 08, 2021 12:00 am (ayatrem) nungi Smartphone Carnival 2021 sale sentong tenzüktsüogo. Iba sale sentong ajanga tongtiban brand nungi smartphone balala nung discount den külemi, bank offers, exchange offers aser no-cost EMI option agütsütsü terenemba lir.

Flipkart Smartphone Carnival 2021 sentong mapang brand talisa Apple, Motorola, Poco, Samsung, Realme, Xiaomi aser tanga brand nungi smartphone tem nung discount angutsü. Iba den bendenloksema, Axis Bank card amshirtemi phone kar nung sen 1,250 instant discount angutsü. Iba sale sentong ya March 12 tashi agitsü.

Flipkart Smartphone Carnival 2021 mapang discount nung agütsütsü aliba smartphone kar:

1. Apple iPhone 11 (64GB)

Apple iPhone 11 nung 6.1-inch Liquid Retina display aser dual rear camera angutsü. Iba smartphone tejaklen 12-megapixel camera angutsü, koba ajanga 4K resolution nung video tem tangoktetsü. Flipkart Smartphone Carnival 2021 sale

mapang, phone jenjang sen 48,999 (MRP Rs. 54,900) tashi ajemtsür. Flipkart Axis Bank credit card amshia alirtemi talila cashback deal angutsü akok.

2. Samsung Galaxy S20 Fan Edition

Iba carnival sale mapang, Samsung Galaxy S20 Fan Edition (aka Galaxy S20 FE) - 128GB storage variant jenjang sen 44,999 agi angutsü. Iba discount den külemi, customer temi tanga 'sale deal' talisa no-cost EMI, sen 23,500 alang exchange offer aser tanga aika angutsü. Samsung smartphone nung 6.5-inch dynamic AMOLED display den triple rear cameras aser 4,500mAh battery dena lir.

3. Poco X3

Poco X3 nung user-friendly feature aika dena lir, koba discount nung agütsütsü terenemba lir. Iba smartphone nung 6.67-inch full-HD+ display den 120Hz refresh rate aser Qualcomm Snapdragon 732G SoC angutsü. Iba phone tesülen quad camera setup inokja lir, kong 64-megapixel primary camera ka angutsü. Iba smartphone nung 6,000mAh battery ka dena lir aser 33W fast charging support asür. Flipkart Smartphone Carnival

2021 mapang tejangrartemi Poco X3 - 6GB + 64GB storage option jenjang sen 14,999 agi alitetsü.

4. Moto G 5G

Motorola Moto G 5G nung Qualcomm Snapdragon 750G, triple rear camera aser 16-megapixel front camera angutsü. Iba smartphone nung 6.70-inch Full-HD display den 90Hz refresh rate aser 5,000mAh battery dena lir. Flipkart sale mapang, 5G support asüba phone jenjang sen 18,999 (MRP 20,999) alitsü. India nung Moto G 5G ya sentsü ana nung angutsü.

5. Asus ROG Phone 3

India nung 'limited gaming smartphone' rongnung Asus ROG Phone 3 ya alitsü. Iba smartphone nung 6.59-inch Full-HD+ AMOLED display den 144Hz refresh rate aser 270Hz touch sampling rate inokja lir. Qualcomm Snapdragon 865+ processor ka ajanga iba smartphone maparen achaayangtsür aser phone tesülen triple camera setup nung 64-megapixel primary camera ka angutsü aser 6,000mAh battery kati tashi agütsür. Flipkart sale mapang, customer temi iba smartphone ya sen 43,999 agi alitsü akok.

Mulungnen



ASO :
10.09.1943

ASÜ :
27.02.20211

Asür N. Tongzuk Jamir (Kangtsüing) Kibubai agütsü, aser Kibubai bener ao. YOB: 1-21.

Onok asoshi akümdong aser onoki teti meima aliba Tebu tajung N. Tongzuk Jamir mapang tatsüka taneptsü bushia mozü kidang shirang yipden nung aliba mapang nungi asü pila mangyim anogo tashi temeimer kija kibong Arogo aser lokti shirinokisa sarasadem nübo shisatsü aser rongsen agi ozü yariogo nenok ajak dang kangasa pelaba lemsateper asen Teyanglur Tsüingremi nenok mapa tajung meyiba moatsütsü onok sarasadem.

- Temeim Kinungtsü, Jala, Semchir, aser Kinungertem.

Security Forces-i telungpur ana apu



Dimapur, Metsüremi/March 07, 2021 (TYO): Security Forces den Police longjemer Hokolbarnü (05.03.2021) Dimapur District kübok Hozukhe general area mita aoba mapang, NSCN (IM) aser NSCN (U) indang telungpur ka ka apu.

Osang tejangja ka angazükba nung ajemdaker, Security Forces den state police longjemer Hozukhe mita aoba

mapang, NSCN (IM) aser NSCN (U) indang telungpur ana ya apu; aser tena ket nungi extortion slip' 25, sen 1290/- aser mobile phone ana ngutet.

Iba maparen dak sendakba nung maneni bushisüingdangtsü atema, pua alir telungpur ana den tena ket nungi ngutetba oset/sen ajak Nuiland Police Station, Dimapur nung agütsüogo, ta sangdong ka ajanga metetdaksü.

NSCN/GPRN (R) ajanga asükhu lemsateper

Dimapur, Metsüremi/March 07, 2021 (TYO): MUZIVOYI PURO, Dy.Kilonser, mapang tatsüka shiranger sülen anjongi Honibarnü (06.03.2021) iba akümlü nungi pila aoba osang angazüka, NSCN (Reformation) mang ayimer, ta MIP, NSCN/GPRN (Reformation) sangdong ka ajanga metetdaksü.

Porbami yimsüing nungi Veswuno Puro'er jabaso asür Puro ya linük meimba nübu ka liasü, shiba sempet balala amshia tasünü tashi Naga nunger asoshi bendanga agüja tenzük.

Puro ya Chairman (Chakhesang Region) inyaka liasü aser CFSB (Ceasefire Supervisory Board) indang züingsem tajung ka liasü.

Lennir tajung, asür Puro-i pa kinungtsü aser chirnur pungo toktsür iba akümlü nungi pilaogo.

Pai ajak den jungtepa ali aser pa nem mapa nungloksüba mapang kodanga atsüayonga melii Naga lima asoshi ochishia aser bendanga agüja inyakogo. Pa asüba ajanga, sempet tajung aketba lenir, tembar tajung aser tatishitsü tajung sayur nübu tajung ka mali kumogo.

NSCN (R)-isa iba ama mangyim jashi mapang Puro-i toktsür aoba kinungertem aser medemertem mulung nung tesünep lidakjang aser asür tanela nem teti tatem maka anisüingzük agüjangma ta Tsüingrem dang sarasadem, ta kasa sangdong ajanga metetdaksü.

Boxam International: India nunger boxers temi medal 10 angu



Boxam International Tournament nung India nunger asayar Manish Kaushik-i Denmark nunger asayar Nikolai Terteryan 3-2 agi akok.

New Delhi, Metsüremi/ March 7 (Agencies): Asayamung nung asaya ka nungi asaya ka ta maneni kanga junga asayaa India nunger asayar Manish Kaushik-i gold medal nguogo aser Castellon, Spain nung asayaba Boxam International Tournament nung India nunger asayartermi medal 10 koker tembangogo.

2018 Commonwealth Games silver medallist Kaushik, shiba taoba kum March ita Asian Olympic Qualifiers nung asayaba sülen tang mezüngbuba asayaa liasü, pai tebur 63kg category final asaya nung Denmark nung asayar Nikolai Terteryan 3-2 agi akok. Ajisüaka World Championship bronze medallist Vikas Krishan tebur 69kg

category final asaya nung Ndiaye Sissokho-i 4-1 agi akok. Tetsür asaya nung Asian champion Pooja Rani-i 75kg final nung Word Championships bronze medallist USA tsür Naomi Graham 5-0 agi makok aser Jasmine, shiba tang mezüngbuba senior international asayamung ka nung asayaa liasü lai 57kg category final asaya nung Italy tsür 2019 European Champion Irma Testa 0-5 agi mekoki silver dang angu Silver medal angurtem rongnung Simranjit Kaur (60kg), Mohammed Hussamuddin (57), Ashish Kumar (75kg), Sumi Sangwan (81kg), aser Satish Kumar (+91kg) densema lir.

Ashish dak Covid-19 tashidak potetba sülen pa final nung masayattertsüsa aküm aser tanungba asayar pezüia kümdangshia alitsü atema asayamung nung shilem magitsü telemtetba agi. Kasa asayamung nung semi-final makokba sülen Mary Kom-i bronze medal dang ngutet. 35buba Boxam International Tournament nung India nunger asayar 14-i (tetsür 6 aser tebur 8) shilem agiogo. Parnok Hombarnü India tonga arutsü.

Mkg Inter Ward Football Tournament March 9 nungi tenzüker

Mokokchung, March 7 (TYO): Tanabuba Mokokchung Town Inter Ward Football Tournament 2021 March 9 nungi 20 tashi "Towards Excellence" omen nung ajemdaker yangi Imkongmeren Sports Complex Mokokchung nung asayatsü sentong renema lir. Iba asayamung ya Marepkong Youth Association-i ayongzüker. March 9 Mungulbarnü anepdang 10:00 ako nung iba asayamung lapokba sentong agitsü aser yangji Class 1 Contractor & NDPP Active

Member, Wb. Moatoshi Tzüdir tetushi tesemdanger asütsü jaoka lir. Iba asayamung dak sentakba nung March 6 nü fixture draw süogo aser taküm ward 16-i shilem agitsü jangjaogo. Pool 'A' nung - Arkong, Salangtem, Dilong aser Mongsenbai ward, Pool 'B' nung - Artang, Majakong, Aongza & Sangtemla, Pool 'C' nung - Alempang, Marepkong, Penli & Lijaba Lijen aser Pool 'D' nung Tongdentsuyong, Sungkomen, Kumlong & Yimya ward-tem lir. Yaküm iba asayamung ya

Arkong Ward-i champion aben aser Artang Ward pur Runner up liasü. Taküma Champion ward nem trophy den senpet sen 50,000/- aser runner up nem 30,000/- agütsütsü aser jurila senpet (individual prize) kar shimteta agütsütsü tayongertem tebilemba lir. Iba asayamung ya Mokokchung town nung lanur sempet aketer nem sabang lapoktsüba den parnok anitena ajungshitsü nükjidong yur ayongzüker. Iba asayamung nung asayar tajungtem shimtetsü sentong lir, ta osang ajanga angazüker.



Deobarnü Las Vegas nung UFC 259 nung world light heavyweight title atema asayaba mapang Jan Blachowicz-i taoba mapang khen danga tamakok mongui alisang Israel Adesanya 49-46, 49-45 aser 49-45 agi kokogo. ??

Phogat-i gold angu; temaba jenjangi tanaben tuogo

Metsüremi/March 7, 2021 (Agencies): Imlaba ama asayatera India tsür wrestler Vinesh Phogat-i, hopta ana tsüingda gold medal tanabuba koktetogo. Matteo Pellicone Ranking Series asayamung nung lai la indang category nung final asaya ayong ayonga koka maneni temaba jenjang tongtetogo. Arishi kum 26 tain World bronze medalist la ya dang tang tashi nung India tsürtem rongnung Tokyo Games atema qualify süa lir aser lai iba asayamung 53kg category asaya nung Canada tsür Diana Mary Helen Weicker 4-0 agi ayong ayonga akok. Vinesh-i la indang point ajak mezüngbuba shilem nung angu aser tanabuba shilem nung maneni point mesamadaktsüi asayaa gold medal angu.

Vinesh-i toba hopta Kiev nunga gold medal nguogo aser tang iba asayamung nung takok tajung anguba ajanga asayamung tulutem atema la renemshiba dak tamang tali kadaktsütsü. La iba asayamung tenzüka mapang jenjang asemububa nung liasü saka tang point 14 nguteta temaba jenjangi tuogo. Canada tsür la ya asayamung tenzüka mapang jenjang 40buba nung liasü saka tang Vinesh sülen tanabuba jenjang nung lir. Vinesh-i iba asayamung nung p;oint ka danga melalu aser asaya anabo la den asayar pin süa akok aser tanungba ana yirur masayateri tuguatok. Kasa mapang nung Sarita Mori Honibarnü 57kg category nung silver medal nguogo.

2021 IPL mapanglem sangdongogo

New Delhi, Metsüremi/March 7 (Agencies): Board of Control for Cricket in India (BCCI)-i Deobarnü taruba Indian Premier League (IPL) mapanglem sangdongogo. Season 14buba mezüngbuba asaya defending champions Mumbai Indians aser Royal Challengers Bangalore na April 9 nü asayatsü. Asayamung nung mezüngbuba asaya Chennai nung asayatsü aser final asaya May 30 nü Modi Stadium, Ahmedabad nung asayatsü. Asayamung tetenzüklen teprangertem marudaktsütsü, ta BCCI-i metetdaktsü. "Taküm IPL tetenzüklen terpranger medeni asayatsü aser asayayonga aoba sülen terprangertem nem temelaba agütsütsü asoshi asadangtsü," ta Board of Control for Cricket in India (BCCI) secretary Jay Shah-i ashi. "League asayaba mapang team ajak asemen dang senzüdaktsütsü asoshi fixture yangluogo aser iba ajanga timtem tetsükdaktsü nungi jenbotsü," ta Shah-i ashi. "Taoba kum UAE nung asayamung ka takok ngua ayongzüka asayaba sülen, asayarterm aser asayamung dak sendaka alirtem ajak health tsütsü tekümüzüka kübok kidang iba asayamung ayongzüka

asayattertsü, ta BCCI-i temulung lema bilemer," ta pai ashi. Telok asaya aser knockout asaya 56 tesem trok nung asayatsü. Asayamung asayatsü asoshi shimba yimitem rongnung Delhi, Ahmedabad, Bangalore, Kolkata, Chennai, Mumbai densema lir. "Taküm iba asayamung April 9 nü Chennai nung defending champions Mumbai Indians aser Royal Challengers Bangalore na asayaa tenzüksü," ta BCCI-i metetdaktsü. "Alima nung cricket stadium tulutiba; Narendra Modi Stadium nung Playoffs asayatsü aser iba tesem nungsa May 30 nü final asayatsü." Iba stadium nung tang mezüngbuba IPL ayongzüka asayatsü. Asayamung nung double headers ajak agi 11 alitsü. Nikongtsütsü asaya 3:30 ako nungi aser aonung asaya 7:30 ako nungi tenzüksü. "Team ajak league stage nung tesem pezüü nung asayatsü. League asaya 56 rongnung Chennai, Mumbai, Kolkata aser Bengaluru nung asaya 10 (each) aser Ahmedabad o Delhi na nung asaya 8 (each) asayatsü," ta kasa sangdong ajanga metetdaktsü. "Taküm IPL nung asaya ajak neutral venues nung asayatsü aser team ka danga parnok

Srinu Bugatha aser Sudha Singh nati New Delhi Marathon kokogo

New Delhi, Metsüremi/March 7 (Agencies): Deobarnü Srinu Bugatha-i pa indang career nung mapang tatsütiba agia alizüng tongteta Ageas Federal Life Insurance New Delhi Marathon kokogo aser Asian Games gold medallist Sudha Singh-i tetsür asemtepa kokogo. Bugatha-i ghonda 2, minute 14 ser second 59 nung alizüng atong, ajisüaka national record 2:30.00 yanglur aliba metongtet koba ajanga Tokyo nung asemtepsü atema maangka agütsüla. Sports Minister Kiren Rijiju,

shiba sempet agütsüba sentong nung dena liasü, pai tenaprongla dang maneni taruba Olympics nung linük tenüng nungi shilem agitsü atema maneni meranga inyatsü ajungshi. "Ni nenaprongla nem takok asoshi aser qualifying mark atongtsü atema merangdangba atema tenüngsang agütsür. Meranga inyakba ajanga nükjidong yakta atongtsü ta ni temulung lema bilemer aser tarutsü nung nenati tongtettsü," ta Rijiju-i ashi. Teburtem rongnung Uttarakhand nungi Nitendra Singh Rawat (2:18:54) aser Army Sports Institute nungi Rashpal Singh (2:18:57) nati silver aser bronze angu aser tetsürtem rongnung Maharashtra nungi Jyoti Gawate (2:58:23) aser Ladakh nungi Jigmet Dolma (3:04:52) nati silver aser bronze ngua liasü.

BILEMDANGANG

"Lonjemer inyakba ajanga alima anokshidaktsütetsü."